

Muki Bricht 2022/2023

Im August händ mir an 18 Chinder en Mukiladig verteilt. Sinteressi isch wie all Jahr sehr gross gsi und gli sind die erschte Amäldige inegflatteret. Insgesamt mit debi sind das Jahr 12 Kind mit ihrn Mamis oder Papis. Damol hämer sogar es Meitli vo Mumpf debi, allgemein hämer i dem Jahr e paar Afroge becho vo uswärtige Mamis.

SThema vo dem Jahr füährt ois id Prärie zum Indianerbueb Yakari und sine Fründe. Als Stundepräsident kreiere mer en Traumfänger. Am Schluss vo jedere Stund dörfe dChind öpis dra hänke, sigs e Perle, Fädere, Hölzli oder es Tannezäpfli.

Am 21. Oktober 2022 händ mir ois serscht mol i de Turnhalle troffe und somit sMukijohr eröffnet. De Fokus vo dere Stund isch ganz im Thema Kännerlerne gstande.

DMukilektion startete jewiels mit eme Begrüssigslied und ere chline lleitig zum Stundethema. Deno gits es lwärme, das cha sie in Form vo Staffette, Fangis usw. Nachher chunt de Hauptteil, wo 5-6 verschiedeneni Pöste ufgstellt wärde. Zum Schluss gits es chlises Usklinge und Schlusslied. Im Aschluss vo de Turnstunde gniesse mer immer sgmüetliche zämesitze bim Znüni ässe.

Mit em Yakari hämer bis jetzt einiges erläbt, sigs am Lagerfüür en Chürbissuppe choche, en Usflug zum Fluss mache oder de Bsuech vo de Regenbogen, dFründin vom Yakari. De chli Donner, sRössli vom Yakari, het doh debi natürlich au nid dörfe fehle.

En Spezielli Stund hämer am 18.11.2022 dusse dörfe erläbe, will mer nid i Turnhalle händ chönne wägem Turnerobe. Zämme simer zum Schöpfli vom Christoph und de Rahel gloffe, wo mer ois denn chli a de früsche Luft bewegt händ.

SMukiturner het am diesjöhrige Turnerobe mitturnt. 7 Chint händ mit ihrne Mamis zum Thema Biene Maya jewiels e Halbstund vor em Muki güäbt und denn am Turnerobe ihres Können zeigt.



Gli hets scho Santi Niggi Näggi gheisse. Uf de Suechi nachem Samichalus hämer verschiedeneni Tier atroffe. Zum Schluss vo dere Turnstund hets zum Znüni e feine Läbkueche und jedem e chlises Chlaussäckli geh.

DVorfreud uf dWiehnacht isch bi de chline Indianer gstiege. Mir händ im Yakari ghulfe Guetzlileig chnätte, sTipizält dekoriere, Päckli ipacke und transportiere und de Baum gschmückt. Als Abschluss händ alli Kinder dörfe ihres Wiehnachtsgschänkli entgegen neh, dasmol hets es e Puzzle vom Yakari geh.

Hüt händ mir wieder afo turne und sind gspannt druf, was für Abentür de Yakari no alles erläbe wird.

Am 31.03.2023 beende mir denn euses Mukijohr mit em traditionelle Vakiturne und eme abschliessende Aperö.

Mit ganz liebe Grüess fürs Mukiturne Annika und Vanessa

